



# -Pamebhamε

"Nimluu : 26 "Su : "plεε -kwe 2009 "su -bha 'sëédhe -mü

WON -TAONG -MA 'GÜ 'SËÉDHE

*Dhiang -wo -tiaandhe*

*'Sëédhe ya -yë -kë -mëwón 'gü ?*

Kwaa 'sëédhe ya 'wón 'në "vlaanvlaan -nu -wo kë- "dhiü 'gbaannu "kεε -a -wón "dhiü =ya wlüü". =Dhe "dhü -kwa kwa -de nu -a -wón -dhe -dedewo. Kö 'ka- ma -së 'ka bha 'aa -yö kë ?

**Kwaa- =danwo pö "se 'gü -wón**

'Sangtaa, 'Sangtaa zanngvie -dhekpaoyi -yaaga -naa (3) 2009



'Wón 'ö 'kwa- "yuv sü bha yö -mü =dhe -kwe 'ö -ziö ya, -a -bha "su -bleesü 'ö -kë zanngvie 'ka bha, 'wón -së 'kpii- -dede -yö kë -kë 'Sangtaa. 'Sëédhe 'ö "kwi 'dhö ö bha pë -dhe disionngnee, "kεε 'ö =Yakuba -nu -zë 'kwa- -dhe -wo kpö "gblügbliü "iin 'zü "gbu- "gbu- -nu -ta "pu 'sëédhe, =në 'kwa kwa -bha -bleesü =sloo. -Yö kë -kë "dhü -kwe 'ö -ziö ya (2009) -bha "su -bleesü bha -a -dhekpaoyi -yaaga (3) 'ka.

-A -tiaandhe -dhe 'ö- -bha 'zü, yö -mü =dhe 'sëédhe bha, kwa =në 'ö 'kwa kë -a -me -yaaga -naa 'ka "Kodivua -se ya- 'gü. "Bawlee -nu =në 'wo me -bleesü 'ka, 'yö =Betee -nu 'wo do mü, 'yö Danwopöme -nu 'kwa do mü. Kö 'wón -së 'kpii- -dede -mü kwa -go. 'Sëédhe bha 'me 'ö- kë -sü -go 'ö kë -gban -a -nu -bha, -a me -bleesü -mü "kwi 'kpii- do 'ö go =Dhuusi "se 'gü 'wo- -dhe Vidrinë Valanngten -a 'ka. -Yö kë -nu 'fetö bha- -ta waa- "kwi dhebë -yaaga 'ö 'wo go pö =Dhuusi -a -nu 'dhö.

'Yö kwaa- 'në 'ö -kë =Kesü Dhifonngsü 'ö- -me do 'ka. =Ya 'go mü 'me 'gbe -wo kë wo -ko -da 'wón bha- 'gü =dhe "Vasa

Zonasü, Gangbhaa Ibee, 'Vasiafa =Diomanngde waa- me 'wee 'bha -nu.

=Ya 'go yö -zë 'gü -kwa "Kwi gön 'ö -kë **Tomaa Beaatö** 'ka 'ö go 'Suisi -se 'gü, -a nuwee bho, -yö kë kwa -ta -dede -kun -a kë -sü "gbluv "piü, -yö kë -nu -ziaanwo troo bha- -ta. 'Fetö bha- -ta, "tan -go -kaongdo ö ga "saaga (18) -wo kë -nu. =Dhuutii -nu -wo kë -go "gweetaa "se =gban 'gü 'wo nu. 'ö 'wo go **Klaa** "dhö. Me tii "kwi "gblügbliü -nu -wo kë -go niveesite =dhe **Kalilu Tera, Abi Sanggare** -a -nu 'dhö. -Zlaan 'gü -me -nu "gblügbliü -nu 'wo go "sanggwinnng "se 'gü, "lugwaa "se 'gü, "Maa "se 'gü, Gbiaangwinng, 'Siiploo "Bhlaaploo -wo kë -nu. Me "wee 'gbe 'bha -nu -wo kë -nu.

'Seedhe -nu 'wo -kë "gwënnng 'seedhe 'ka, "yu -to 'gü -wón -bha -nu waa- 'bha -nu -wo -gun mü.

'Wonsë Magödhitö Boli waa- -Masë Évö 'Flikö -wo kë wo -ko -da 'sëédhe 'ö yö "kpenng bha, -a -wón 'gü.

## L'orthographe DAN

Voici ce que nous pouvons utiliser pour savoir lire et écrire en langue dan.			ëë	"këë	daba	ü	'gü	intérieur
Les consonnes et les voyelles que vous ne voyez pas ici sont les mêmes qu' en français.			ën	'kën	rassasier	üü	"güü	amère
Attention:			ëën	=klëën	entourer	ün	=blün	miètte
1. c, h, j, qu et x n'existent pas en dan.			ea	"kpea	sec	üün	glüün	rouler
2. r ne se trouve jamais au début d'un mot.			ean	gean"	scorpion	ü	"gü	brûler
Voici le reste de l' alphabet :			gw	-gwë	caillou	üü	"bhüü	tarir
<b>Lettres Exemple</b>	<b>Traduction</b>		in	"bin	fleur	u	"tu	oreille
Aa	"kaa	gale	iin	"iin	ou	uu	"tuu	sauce
An	"gan	tirer	l	"wl	parler	<b>-Wo 'dho -ko ( Les tons )</b>		
Aan	saan	cadeau	u	"gbu-	fort	très haut		"dhü arbre
ao	kaö	perdrix	kw	=kwaa	main gauche	haut		'ko maison
aön	'daön-	araignée	ng <sup>1</sup>	gbeng	nuit	moyen		dë père
bh	-bho	cabris	oo	-zoo	chenille	bas		=zë termite
dh	dhe	mère	o	'po	credit	très bas		-dho amour
ee	=wee	sel	ön	"yon	huile	très haut + très bas		"klang- singe
			öön	=yöön	sang	haut + très bas		'yënnng- soleil
			ö	pö	dire	moyen + très bas	saa-	savon

## Kwaa- "Kɔdivuaa -sɛ 'gü -wɔn



### 'Wɔn 'ö -gban 'në dhebë 'sɛennë -nu -bha -dho gɔɔn "piü -sü -bha

-Kɔ -loo 'ko -ta 'bha  
bha -wa -dhɛ **'NIDë**. 'ö  
-ya 'Flanngsü -a yi -ya  
=gwëë (1937). 'ö -ya  
-kwaa "sɛ ya- 'gü, -a -kwɛ  
=ya kɛ 'gbɛ (1996). -A  
-bha yë -mü 'në dhebë  
'në -nu 'wo "nuu- zë -naa  
bha, -a -nu -kɔ -bho 'wɔn  
yaa bha, -a -bha -sü -bha,  
'yö -yaa -nu -ya yë 'ö 'wo  
dho- kɛ kɔ -wo wo -de  
=slɔɔ, -a -nu -bha =dhɛ sɔ  
-wɔ -sü waa- "wɛɛ -sɛ  
'bha -nu 'dhö. NIDë bha,  
'wɔn 'suaan 'ö- bho, -ya  
**Kpungtaadhɛ -wɔn**

-pö kwaa- 'në dhebë 'në  
-nu -wo -to 'sɛennë 'wo  
gɔɔn- wɔn dɔ. -A -kwɛ  
"saaga -naa =nɛ (2001)  
'në dhebë 'në -nu -kwɛ  
-yö -mɔɔ -kaɔngdo ö ga  
"saado (15) -bha 'yö 'wo  
gɔɔn -wɔn dɔ. -A kwɛ  
'dhe 'ö yö- "piü 2002, -a  
-nu -kwɛ -yö -to -kaɔng do  
ö ga -yiisiö waa- -kaɔng  
do ö ga "sɔɔdhu (14 waa-  
15) -bha 'yö 'wo gɔɔn- dɔ.  
-Kwɛ 'dhe 'ö -ziö ya  
(2008), 'yö NIDë -yö 'wɔn  
=slɔɔ 'gü =dhɛ 'mɛ -ziaan

'ö -nu -kwɛ 'dhö -kaɔng  
do (10) -wa -ya 'nu gɔɔn-  
wɔn dɔ -sü -bha 'Biya,  
Yopug ɔn -dhɛ, -Gɛnmɛ,  
'Pɔɔbue -dhɛ -nu 'gü.  
'Kwa =yɔɔn sië "dhiü  
bhoo, 'yö 'në -nu bha -a -  
nu -kwɛ bha -yö =lɔɔ. -A  
'në dhebë -nu 'wo =klang-  
"dhiü, -a =klang- 'sɛennë  
-nu, -a 'mɛ -nu 'wo  
kolɛzië, 'mɛ -nu 'wo  
Nivɛɛsite -a -nu =gban -kɔ  
-yö 'wɔn bha- 'gü. -A 'dhe  
'ö 'wëësü, yö -mü =dhɛ  
'në 'bha -nu 'wo bha, -a -

nu 'kpɔ -mɛ -nu =në 'wo-  
nu zü =yɔɔn 'wɔn yaa suu  
bha- -bha -a pö -sü 'ka-  
nu -dhɛ =dhɛ: «'Bha  
=mɔɔ, ü -de -dhɛ mɔɔ- pë  
'bha 'yaa yi -gɔ =dhɛ  
'wëë- 'dhö kɔ yaa ü dhe  
'yi nu ü -dhɛ.» 'Në 'kpɔ -  
mɛ, -kwa kwa -de 'kun.  
'Kwa 'dho -glɛng suu bha-  
-da 'në -nu -bha.

### Mɛ 'kɔn -wɔn -dede



Kwaa "su 'ö -kɛ "plɛɛ  
'ka 'ö "kwi -zë 'ö- -dhɛ  
zuɛɛn bha, -bha  
-dhekpacyi -kacyaaga  
(30) -naa -dede bha  
'yö gɔ -maa ('viɔng do  
'ö gun 'go sië  
-Flanngsü "sɛ 'gü  
'vɔng- 'so -dhɛ 'ö  
'Flanngsü 'wo- -dhɛ  
'Siadhö Dö 'Gɔlö 'ö  
gun 'dho sië metii  
"sɛgɔ 'ö -kɛ **Komɔɔ**  
-dhɛ 'ka, "mɔɔ- zë -nu  
-bha "sɛ 'ka 'ö -pö  
=wee -yi =bhaa kɔ =ya

bo =loo -dhɛ -ziaan -bha mü.  
=Dhe 'ö go 'Flanngsü, 'yö ö  
"tɛɛpa "sɛ 'bha 'wo- **Yemɛnë** -  
dhɛ -kɛ -a -bha 'pö- 'kpɛi- 'wo-  
dhɛ Sanaa -a 'gü. Yemɛnë -dhɛ  
bha -yö -ya -sü 'ka Etiopi -dhɛ  
waa- Adhabi Sauditë -nu  
=zinng 'gü. -Dhe bha- 'gü, mɛ  
'bha -nu -wo kɛ -lɔɔ 'yö gun  
'dho- -naa ö bha "ta 'ka "dhiü.  
Komɔɔ -dhɛ bha -yö -ya -sü 'ka  
Tangzani -dhɛ 'dhö, Somali -  
dhɛ 'dhö Madagasikaa -dhɛ -nu  
=zinng 'gü. "sɛ kpö -yiisiö -mü  
'yö 'wo -ya -sü 'ka "yi =zinng  
'gü mü. Mɛ kɛngdo ö -kɔ -wo -gun -kaɔng

"sɔɔdhu waa- mɛ  
-yaaga (153) =në  
'wo gun- 'gü. 'Në  
dhebë 'në  
dosengseng =në 'ö  
kɛ dha. -Wa -dhɛ  
**Baya Bakadhi**. -A  
-kwɛ -yö -kaɔng do  
ö ga =plɛ (12). -A  
dhe -zë -a -gɔ -yö kɛ  
-to 'gü. -A dɛ -zë  
'yaa gun- -nu  
=keng-. 'Mɛ -nu 'ö  
'wo ga bha,  
-Flanngsü -mɛ -nu  
-wo -gun -kaɔng

"saado ö ga "saado (66)  
'yö Komɔɔ -mɛ -nu 'wo  
gun mɛ -kaɔng -yiisiö ö ga  
"sɔɔdhu (45).  
"Kɛɛ tɛanwɔn -ya -pö -ka  
n pö, 'viɔng- bha =ya gun  
=ya kɛ =zii. -Kwɛ -kaɔng  
do ö "suesiö =në 'ö -yaa  
kɛ. Mɛ 'bha -nu -sü -a  
'klɔɔ- -mü =dhɛ -a song  
'yaa "gbu.  
-Pameame -ya -pö 'kwa-  
kɛ -sɛ. -A 'gbɛ -dhɛ 'gü gɔ  
-nu, 'viɔng- -nu 'ö -nu  
song 'yaa "gbu- bha 'yö

kwa zuɛ" 'dhö dɔ- - 'ta 'kpɔ.  
bha -foodhö kö kwaa

### **Me =slɔɔ -pɛ -nu -wɔn**

#### **-Dhöö -bhlaa -wɔn bha 'wɔn -sɛ -mü**

N dheebhang, n dɛ -nu,  
-a 'dhe 'ö ya -Pameame  
-yaa -bleɛsü pö, -yaa  
=plɛ -naa pö, 'yö 'go siɛ  
'mü 'yö- -yaaga -naa  
'bha pö siɛ 'zü ya.  
"Tüng 'ö 'kwa dɔ- 'gü ya  
mɛ 'yaa mɛ "tüng kɛ ta  
-pɛ doseng ta -sü  
'gü.=saaga 'gbɛ =ya kɛ  
=saa -bha 'yö -kɛ -sɛ.  
'Yö- 'bha 'yii yö wü  
-bha, =ya 'dho "wɛwɛ,  
'yö 'ü- 'bha sü. 'Bha ü  
"tüng 'to pɛ do 'gü =ya  
see- kö 'bha 'to.

Yö =nɛ 'kwa- -kɛ,  
"iin 'ö kwa dɛ -nu 'wo-  
-kɛ 'yö "kaflu waa-  
=kakao -nu bha -pö 'ö  
-waa wo ya, -tosea =ya  
kɛ kwa -bha "gbü-  
-dedewo kwaa- "pɛɛn  
-nu -ta bha. -A -wɔn 'gü,  
'mɛ 'kö pɛ ta -dhe -zɛ,  
-a 'bha 'dhö ü -gɔ, kö  
-bhö ü 'gü dɔ "gbü- kö  
'ü -dhöö -dhü ta.  
=Trɔɔn 'ö- 'gü, -a dhiang  
'yaa zɛ -dedewo. -A  
-gɛn -mü =dhe kö -yö  
yö- -bha, ü- "yi -bho  
"dhɔɔgɔ doseng 'gü

=plɛ. Dɔ 'ö 'kwa wo  
=dɛɛ ya, 'Biya "pɛɛn -ta,  
yö =nɛ mɛ 'gbɛ 'dhö- ta  
-sü 'ka. -A 'pö- -mɛ -nu  
oo-, -a 'mɛ -nu 'wo "kwi  
=plöo oo-, -wa ta -sü  
'gü -ziisü.  
=Ya 'go yö -zɛ 'gü,  
ka -mɔɔ- -bha 'pö 'ö 'ka  
-mlü -bhlaa "gblügbü  
-nu kpɔ 'ö 'ka- -mlü  
"dhɔɔ -nu dɔ. 'Kwa 'ke-  
kɛ -kwaa -mlü -nu 'kun  
-sɛ. 'Kwa- 'dho pɛ -nu  
-kpa 'ö- -kpɛa -nu -wo  
to 'ö 'kwa- -nu =wɛnng.

Pɛ see- "tüng 'yaa mü  
'ö 'kwa dɔ- 'ka ya.

Kö 'kwa- 'gü ma kö  
'kwa =gwɛɛ bha 'aa -yö  
kɛ -oo?

'Pɛ -nu 'ö -a -nu ta  
-sü =ya nu "tüng ya-  
'gü, -a 'bha -mü 'pö  
-zɔɔsɛa 'ka. "Kwi -zɛ -yö  
ö bha pɛ -dhe zatrofa.  
"Kɛɛ yö -zɛ kwa -dho -a  
-bha pö =taama =tɔn.  
'Yaa yö -zɛ -a 'ka, -ya do  
'yaa- =gban 'sü.

#### **'Wɔn 'ö -gban -potaasü -wɔn -bha.**

"Nunu yaa =ya nu "Kɔdivuaa

-Kwa kwa -de 'kun ! -Kwa

kwa -de 'kun

"Mɛ 'ö "nunu -dho 'ö kwa -kɛ, -kwa kwa -de 'kun,  
"nunu yaa =ya nu "dhɔɔ 'kwɛɛ-.

"Nunu bha -wa -dhe **bledile kroasanng**. 'Nɛ -dee  
-nu -bha -mü.

'Sɛɛdhe 'ö =nɛng -sü 'ka -a 'kplɛɛ- bha, 'pɛ 'ö  
-ya -sü 'ka- -ta yö -mü : <<'Medɛ 'inö flensi>><<'Made  
**in frence**>>. "Nunu bha, -yö =bedhe "dhɔɔ -dɔ 'gü  
-kɔ -nu 'wo -kɛ faamasi -nu 'ka bha- 'gü. 'Ö 'wo-

-nu "dhɔɔ dɔ 'zü "dhɔɔ -kɔ "gblügbü -nu 'gü,  
-genmɛ -dhe waa- Bɔbɔ -nu 'gü.

-A sɔnng -yö 'wɛɛ- -kaong -yaaga (150).  
"Nunu bha =ya 'nɛ 'seennɛ 'gbɛ 'wo 'nɛ -dee  
-nu 'ka -a -nu "yan -ma 'flangbho -Flanngsü "sɛ  
'gü.

"Nunu suu =plɛ -naa 'ö pɛ 'dhö- "piü, -a  
=plɛ -naa =nɛ bha. -A -bleɛsü 'ö gun bha -wo  
-gun -a -dhe siɛ **melaniɛ**.

#### **'Wɔn 'ö -gban troo -nu -bha mɛ wɔnko -nu 'gü**

"Kɔdivuaa mi =plɛ : =Beenaa 'Be- Dadie waa- Sidhiki Bakabaa =la 'ö 'wo- =slɔɔ

"Kwi -a "su 'ö -kɛ zuee  
'ka 'ö 'kwa- -dhe -gbɛkɔ  
bha, -a -bha -dhekpacyi

"saaga (8) bha, -wo kɛ  
"Kɔdivuaa mi =plɛ -gba  
=la 'ka mɛ tii "sɛ 'ö -kɛ

Aliziödhi 'ka, -a -bha teatrɛ kɛ -dhe 'gü.  
'pö- 'kpü- 'wo- -dhe  
Aliziee bha, -a -bha

=Beenaa bha, -yö -kɛ  
'sɛɛdhe -bɛn zɛ -mɛ

'kpɪi- do 'ka "kɔdivuua.  
=Ya =la =slɔɔ 'gbɛ. -Yö  
kɛ- do -slɔɔ -kwɛ 'ö -kɛ  
**1956** 'ka bha- 'gü, kö -  
ya 'sɛɛdhɛ -be 'ö- 'tɔ  
'dhö -kɛ «**'Pödhɛ 'ö me**  
**'yaa ga- -bha**» 'ka -yaa  
-ben zɛ, 'yö- =plɛ -naa  
=slɔɔ -kwɛ **1968** 'ka-  
'gü, kö -yaa 'dhɛ 'ö -kɛ  
«**"Niyɔɔkɛ =Patrɔnng**»  
'ka, -a kɛ. 'Yö -a -yaaga  
-naa =slɔɔ -naa 'zü bha.

"kɛɛ -ya -nu =gban -slɔɔ  
-a -bha 'sɛɛdhɛ -ya -sü  
=nɛ- "gblɔv "piü.

**'Sidhiki Bakabaa**  
-zɛ "sinima kɛ -mɛ  
'kpɪi- -dede -mü.  
"Kpungtaa -dhɛ -to  
"dhü -sü -ya -dɔ. -Yö  
=la 'kpɪi- -slɔɔ kö -ya  
"sinima 'ö- 'tɔ 'dhö -kɛ  
«**"Usimanɛ Sangbenö**  
**-bha kanng Tiaroyɛ** »  
'ka -yaa -wo. Bakabaa  
bha, yö =nɛ troo -kɛ

'gü -kɔ 'kpɪi- 'ö kwa -gɔ  
'Biya "kwanngdhɛ 'ö -  
kɛ "Tresiovilö 'ka- 'gü  
bha, =nɛ- didhetɛɛ  
'kpɪi- 'ka. -A -bha yɛ  
-mü -a "slɛ mɔɔ- -sü  
'ka kö mɛ "bhudhe -yö  
'go "gan 'gü. Pɛ 'ö- -nu  
-zɔn "sinima 'gü 'yö 'wo  
bha.

=Ya 'go mü  
-Gbeko "su 'ö ya, 'ö sü-  
-dhekpacyi -kaɔdo ö ga  
"saaga **(18)** -bha 'ö yö

'ka -a -kaɔng =plɛ ö ga  
"sɔɔdhu **(25)** -bha,  
=bhlɛɛ -dho -ya 'ka  
"sinima kɛ do 'bha 'ö  
-kɛ 'pɛ "Kɔdivuua 'nɛ  
'ka 'wo- -dhɛ Timite  
Basudhi, -a -bha. -Yö  
-dho kɛ- Metii "sinima  
troo 'kpɪi- 'kaɔng do ö  
ga =plɛ -naa -zɔn -sü  
'ka.

## "Yu -wɔn

### -Tɔ 'ö- -gɛnga 'dhö do

'taablɛ -bha =dhɛ -tɔ bha-  
"gban ga do 'yaa mü. =Dhɛ 'ö  
-kɛ "dhü, 'yö pɛ -kpa -mɛ  
bha- dhɛa" kɔɔ -tɔ "gban ga  
do 'ö to- -wɔn 'ka; 'yö- pö ö  
=patrɔnng -dhɛ -tɔ =gban  
"pɛpɛ "gban ga -yö do.  
'Yö- =patrɔnng 'dhö- pö :<<  
'Bha- -dhɛ yö 'mɛ do =dhɛ -tɔ  
"gban ga -yö do ? >>

"Kwi gɔn do =nɛ 'ö- pö ö bha pɛ  
-kpa -mɛ-dhɛ -yö -tɔ do -kpa. 'Ö  
'Wɔn bha 'yö -kɛ -nu -gɔ zɔɔdhe  
'ka. 'Yö- =patrɔnng 'dhö- pö : <<  
-Ko 'dho -dhɛga -tɔ -kluu 'gü  
kö -tɔ "gban ga 'dhö do kö 'ka-  
-dhɛ yö. >> Patrɔnng, -tɔ bha 'ö gun  
'Yö 'wo -ziö. 'Wo =loo mü kö  
-dhe do -yö -ya siɛ ö -yaan -ta. 'Yö  
"kwi gɔn bha 'ö- pö : << -psss, -psss.  
>> -Aga, 'yö -tɔ bha 'ö =wlüü. 'Yö  
"kwi gɔn 'dhö- pö : << 'Bha -dhɛ yö -

dho 'go- yɛ "dhiü =midi 'ka kö- -tɔ  
=ya ma. 'Yö 'wɔn =slɔɔ- 'gü  
ee ? 'Bhii- pö -tɔ =gban "gban ga  
-yö do -ee ? >>  
'Yö pɛ -kpa -mɛ bha 'ö- pö : <<  
kö 'ka- Patrɔnng, -tɔ bha 'ö gun gɔɔ  
-yö kɛ -bho; 'mii kɛ- pö : -psss, -psss =dhɛ  
-tɔ bha 'dhö, 'pɛ 'ö -kɛ 'ö- "gban ga 'dhö  
do bha, 'yö bha.

**Kimse Etienö**

## "Gwüŋg

Kwa dɛ -nu -wa -pö =dhɛ : <<=**Nawaan -mɛ =nɛ 'ö dhebɛ zii 'dhö 'gu sü- -gɔ.** >>

### Pɛ -Wlangda -sü

Kwaa- "yuv -mü, kwaa-  
"yuv -mü !

"Gweetaa "sɛ -bha "gbɔfɔnama "iin "kumana  
sɛennɛ (**Preefe**) 'ö 'wo- nu- -dhɛ bha, yöö nu -ya  
"Sangtaa "kwi -a "su 'ö -kɛ 'Utö 'ka, "kɛɛ 'ö kwa -  
zɛ 'kwa- -dhɛ "**Zɛ** bha, -a -dhekpacyi "saɔplɛ (**7**) 'ö  
-kɛ kwaa- "Kɔdivuua -sɛ -bha -yaflɛägüsü "iin  
depanngdanngsü -dhekpacyi 'ka bha, -a 'ka. =Dhɛ  
"dhü kö "Gweetaa -mɛ -nu -Pameame -ya -dhɛ mɛ

=gban "pɛpɛ ka -gɔ kö 'ka nu mü. **Kö mɛ**  
**"pɛpɛ 'ö "gweetaa -mɛ -nu -dho 'dhö ka -kɛ, -ka**  
**nu yi -dho -bha. Yi -dho yi -kɔ -ya ka -dhɛng -**  
**bha -sɛ -dede 'ka.**

**-Ka nu, -ka nu. Kwa -yɛɛ -yö "gweetaa.**

'Ka ka bo 'sɛɛdhɛ ya- -wo pö -sü 'ka, 'wɔn 'bha =ya kɛ ka -gɔ kö 'ka pö yi -dhɛ, -ka 'sɛɛdhɛ kɛ kö 'ka  
bɔ. Yii- 'dresü -mü **08 BP 857 Abidjan 08 'ka. Tel. 22.43.12.72.**